



Značajan iskorak ka istraživanju i proučavanju historije Islamske zajednice u Bosni i Hercegovini

(*Bibliografija radova o Islamskoj zajednici u Bosni i Hercegovini: period između dva svjetska rata I i II*, Institut za islamsku tradiciju Bošnjaka, Sarajevo, 2024, 428 i 430 str.)

Krajem 2024. godine Institut za islamsku tradiciju Bošnjaka objavio je dvotomnu publikaciju *Bibliografija radova o Islamskoj zajednici u Bosni i Hercegovini: Period između dva svjetska rata I i II*. Ova publikacija rezultat je višegodišnjeg istraživačkog projekta čija realizacija je započeta 2019. godine. Inicijalna faza ovog projekta rezultirala je objavljivanjem prve publikacije pod naslovom *Bibliografija radova o Islamskoj zajednici u Bosni i Hercegovini: austrougarski period 2021. godine*. Tri godine kasnije objavljena je ova publikacija koja se fokusira na period između dva svjetska rata (1919–1941).

Sadržaj publikacije

Opsežni materijal koji obuhvata međuratni period podijeljen je u dva toma. Prvi tom koncipiran je na način da se bibliografija radova o Islamskoj zajednici u štampanim djelima nalazi na samom početku *Bibliografije*, a slijede je bibliografije radova o Islamskoj zajednici iz štampe i periodike. Potonje bibliografije objavljene su abecednim redom, shodno nazivu

časopisa ili lista. Zbog obimnosti građe u ovom periodu, odabrani su i obrađeni ključni izvori koji su kontinuirano pratili aktivnosti Islamske zajednice, često objavljujući članke o njenom djelovanju.

Listovi i časopisi koje uključuje prvi tom *Bibliografije* su: *Budućnost: organ naprednih nacionalista za rad među Muslimanima*, *Domovina: nezavisni muslimanski list*, *El-Hidaje*, *Gajret*, *Glasnik Islamske vjerske zajednice*, *Hikjmet*, *Iršad: Glasilo Jugoslovenske Muslimanske Narodne Organizacije*, te *Islamski glas: nezavisni kulturno-prosvjetni i informativni list*.

Drugi tom *Bibliografije* uključuje sljedeću periodiku: *Islamski svijet: glasilo muslimana u Kraljevini Jugoslaviji*, *Islamski svijet: kalendar*, *Jugoslavenski list*, *Muslimanska Svijest*, *kalendar Narodna uzdanica*, *Naša pravda: nezavisni list autonomističkih muslimana*, *Novi Behar: list za pouku i zabavu*, *Obrana: glasilo Muslimanske narodne stranke*, *Obzor*, *Pravda: glasilo Jugoslovenske muslimanske organizacije (JMO)*, *Pregled – Časopis za politički i kulturni život*, *Slobodna riječ: glasilo javnog mišljenja muslimana u Jugoslaviji* i list *Večernja pošta*.

Svaki od naznačenih listova, glasila ili novina u uvodnom dijelu kratko je predstavljen, nakon čega su hronološki navedena godišta i godine izlaska časopisa. Navedena godišta prate bibliografske jedinice koje su unutar određenog godišta svrstane abecednim redom.

Sve bibliografske jedinice praćene su ključnim riječima koje daju uvid u sadržaj članka. Oba toma sadrže iscrpan predmetni registar i registar autora, koji olakšavaju istraživačima pronalaženje potrebnih informacija. Predmetni registar sadrži samo glavne ključne riječi, dok dodatne ključne riječi koje se nalaze u opisu jedinice pružaju dodatno pojašnjenje za ključne riječi koje su dio predmetnog registra, odnosno daju uvid u sadržaj članka.

Ukupno, ova dva toma uz prethodno objavljenu publikaciju *Bibliografija radova o Islamskoj zajednici u Bosni i Hercegovini: austrougarski period* obuhvataju impresivnih 9014

bibliografskih jedinica, obrađujući 21 časopis iz međuratnog perioda i 22 časopisa iz austrougarskog perioda, na više od 1100 stranica. Uz ovo, obrađena su i štampana djela iz perioda koji obuhvata 63 godine.

Autori bibliografije

Ovaj rad rezultat je uspješne saradnje tima autora i izdavača *Bibliografije*. U izradu bibliografije radova o Islamskoj zajednici u periodu između dva svjetska rata bili su uključeni bibliotekari, historičari i drugi stručnjaci koji se bave historijom Islamske zajednice u Bosni i Hercegovini.

Autori prvog toma su: Zehra Alispahić, Elvir Duranović, Lamija Hamzakadić, Mehmed Hodžić, Amina Kadribegović-Mehić, Sumeja Ljevaković-Subašić i Emir Šečić, dok su autori drugog toma: Zehra Alispahić, Edin Čolaković, Ejla Ćurovac, Haris Dubravac, Lamija Hamzakadić, Mehmed Hodžić, Lamija Husić, Anida Ibrčić, Sumedin Kobilica i Amina Svraka.

Nakon pisanja *Bibliografije*, bibliotekarke mr. Lamija Selhanović te mr. Halima Kekić pripremile su predmetni indeks i indeks autora. Da sve bude u skladu s bibliotečkim propisima pobrinula se bibliotekarka mr. Ejla Ćurovac koja je izvršila posljednje ispravke i korekturu registra autora i predmetnog registra.

Digitalna dostupnost

Ono što ovu publikaciju izdvaja jeste njena dostupnost u štampanom i digitalnom formatu. Online verzije, dostupne na web-stranici Instituta, omogućavaju slobodan i besplatan pristup istraživačima širom svijeta. Ovo odražava posvećenost izdavača ove publikacije Instituta za islamsku tradiciju Bošnjaka misiji širenja znanja i približavanja saznanja široj javnosti.

Osnova za buduća istraživanja

Bibliografija radova o Islamskoj zajednici u Bosni i Hercegovini: Period između dva svjetska rata I i II

rezultat je predanosti Instituta za islamsku tradiciju Bošnjaka da se historija Islamske zajednice detaljno istraži, zabilježi i učini dostupnom za naučne i društvene potrebe. Ova publikacija pruža uvid u period kada je Islamska zajednica igrala vrlo važnu, ako ne i ključnu ulogu u oblikovanju društvenog života, obrazovanja

i očuvanja identiteta Bošnjaka. Publikacija obuhvata širok spektar informacija o Islamskoj zajednici, od aktivnosti Islamske zajednice, pa sve do ključnih historijskih događaja i ličnosti tog vremena. Stoga, ona predstavlja neizostavan izvor za historičare, sociologe i istraživače koji se bave historijom Islamske zajednice

u Bosni i Hercegovini. Njena pažljiva kompilacija čini je temeljnim djelom za buduća istraživanja i proučavanja kompleksne historije ove značajne institucije, dok njena dostupnost u digitalnom i štampanom obliku osigurava njenu trajnu vrijednost kao referentnog materijala.

Sumeja Ljevaković-Subašić